

乾隆汾州府志

汾州府志卷之十四

人物二

辛太保仲甫字之翰汾州孝義人曾祖實石州推官祖迪壽陽令父藩河東節度判官仲甫少好學及長能吏事偉姿儀器局沉厚周廣順中郭崇掌親軍領武定節制署仲甫掌書記顯德初出鎮澶淵仍署舊職崇所親吏爲廂虞侯部民有被刼殺者訴陰識賊魁卽捕盜吏也官不敢詰仲甫請自捕逮鞠之吏故稽其獄仲甫曰民被寇害而使自誣服蠹政甚矣焉用僚佐爲請易吏以雪冤憤崇悟移鞠之乃得實狀崇移鎮真定改深趙

鎮觀察判官太祖受命以崇爲監軍陳思誨密奏崇有
姦狀上怒且疑遣中使馳往驗之未至崇憂慙失據謂
賓佐曰苟王人不察爲之奈何皆愕相視仲甫曰皇帝
膺運公首効節軍民處置率循常度且何以加辭第遠
偵使者率僚屬盡郊迎禮聽彼伺察以當自辨矣崇如
其言使者至視崇無他意還奏上大喜歸罪於思誨仲
甫又隨崇爲平盧軍節度判官崇卒改鄆齊觀察判官
累雪冤枉乾德五年入拜右補闕出知光州州有橫河
與城直會霖潦暴疾水溢潰廬舍仲甫集船數百艘軍
資民儲皆賴以濟六年移知彭州州卒誘營兵及諸屯

成謀以長春節宴集日爲亂屬春初仲甫出城巡視見
濠中草深意可藏伏命燒薙之兇黨疑謀泄有自首者
擒百餘人盡斬之先是州少種樹暑無所休仲甫課民
栽柳蔭行路郡人德之名爲補闕柳太祖問羣臣文武
兼資者爲誰趙普以仲甫對徙益州兵馬都監代還遷
爲三司戶部判官太平興國初遷起居舍人奉使契丹
遼主問黨進何如人如進之比有幾仲甫曰國家名將
輩出如進鷹犬材耳何足道哉遼主欲留之仲甫曰信
以成命義不可留有死而已遼主竟不能屈使還以刑
部郎中知成都府既至奏免歲輸銅錢罷榷酤政尙寬

簡蜀人安之八年加右諫議大夫時彭州盜賊連結爲害詔捕未獲仲甫誘令自縛詣吏者凡百餘人餘因散去九年入知開封府拜御史中丞雍熙二年拜給事中叅知政事端拱中進戶部侍郎時呂蒙正以長厚居相位王沔任事仲甫從容其間而已淳化二年以足疾罷爲工部尙書出知陳州代歸會蜀不寇以仲甫素著恩信將令輿疾招撫以疾未行無何以太子少保致仕真宗卽位加太子少傅咸平五年卒年七十四贈太子太保子若沖若海若濛若濟若渝皆能其官孫有孚有鄰俱舉進士

侯侍郎仁寶汾州平遙人趙普妹婿也父益宋乾德三年贈中書令仁寶以蔭遷太子中允盧多遜與普有隙普罷相以仁寶知邕州州之右江生毒藥樹宣化縣人常採貨之仁寶以聞詔盡伐去九年不代太平興國中上言陳取交州策太宗令馳驛召歸多遜據奏曰若召仁寶其謀必洩蠻夷增備未易取也不如授仁寶飛輓之任且經度之別遣偏將發荆湖士卒一二萬人長驅而往勢必萬全遂以仁寶爲交州水陸計度轉運使前軍發遇賊鋒甚盛援兵不繼死江中太宗聞之甚悼惜特贈工部侍郎錄其子延齡延世並爲齋郎延齡至殿

汾州府志 卷十四
中丞延世至太子中舍

侯都部署延廣汾州平遙人祖益父仁矩延廣初在襁
褓中遭王景崇之難乳母劉氏以己子代延廣死劉氏
行勾抱持延廣至京師還益及仁矩歷通祁雄三州刺
史悉以補牙職在雄州時方飲宴寇數十騎白晝入州
城延廣引親信數騎馳出射殺其酋一人斬首數級悉
擒其餘黨仁矩喜拊其背曰興吾門者必汝也監軍李
漢超以其事聞詔書褒美賜錦袍銀帶仁矩卒補西頭
供奉官太平興國初護延州軍兼緣邊巡檢善撫士卒
下樂爲用戎人畏服遷閣門祗候會西北戎入寇求可

使微巡者近臣言延廣將家子習邊事無出其右時延廣病強起之遷崇儀副使充同鄜坊延丹綠邊都巡檢使延廣力疾入辭太祖賜以名藥及方遣太醫隨侍戎人聞延廣之至不敢復爲寇亂叛卒劉渥嘯聚亡命數百人寇耀州富平縣謀入京兆其勢甚盛所過殺居民奪財物縱火而去關右騷然延廣率兵數百自間道追之會渥於富平四十五里渥衆已千餘人相持久之渥素憚延廣傳言我草間求活觀死如鴻毛耳侯公家世富貴柰何不思保守而與亡卒爭一旦之命於鋒鏑下延廣怒因擊之挺身與渥鬪關大樹下斷渥右臂渥脫

走乘勢大破其衆，遲創甚，止谷中。後數日，爲追兵所獲。遲素號驍勇無敵，至是爲延廣所殺，羣盜喪氣，餘黨稍自歸。關右以定，上嘉之，擢拜崇儀使。淳化二年，李繼遷始擾夏臺，卽命延廣領獎州刺史，知靈州，賜金帶名馬，會趙保忠陰結繼遷，朝廷命騎將李繼隆率兵問罪，以延廣護其軍。旣而夏臺平，保忠就縛，手詔褒美，錫賚甚厚。師還，留爲延州鈐轄，會節帥田重進老耄，郡中不治，以延廣同知州事。兼緣邊都巡檢使，先是延廣知靈州，部下嚴整，戎人悅服。李繼遷素避其鋒，監軍康贊元害其功，誣奏延廣得虜情，恐後倔強難制，遂詔還，以募

容德豐代之部內甚不治至道間繼遷寇靈州朝廷謀帥同知樞密院事錢若水稱延廣可使就拜寧州團練使知靈州兼兵馬都部署賜白金二千兩歲增給錢二百萬戎人塞道郵傳餽餉皆不通延廣獨引數十騎之鎮戎人素服其威名皆相率引避二年春病上遣御醫馳驛視之醫至疾已亟延廣謂中使李知信曰延廣自度必不起家世受國恩今日得死所矣但恨未立尺寸功以報上耳言訖而卒年五十上聞之爲出涕賙賻甚厚以其子爲六品正員官子紹隆東染院使帶御器械紹隆子宗亮右侍禁閤門祗候

趙景肅昌言字仲謨汾州孝義人父獻從事使府太宗
尹開封選爲雍邱太康二縣令後終安申觀察判官昌
言少有大志趙逢高錫寇準皆稱許之太平興國三年
舉進士文思甚敏有聲於場屋爲貢部首薦廷試日太
宗見其辭氣俊辯又覩其父名謂左右曰是嘗爲東畿
宰朕之生辰必獻詩百韻爲壽善訓其子亦爲可嘉也
擢置甲科爲將作監丞通判鄂州拜右拾遺直史館賜
緋魚選爲荆湖轉運副使遷右補闕會省副職改知青
州入拜職方員外郎知制誥預脩文苑英華雍熙初加
屯田郎中明年同知貢舉俄出知天雄軍時曹彬崔彥

進米信失律於岐溝昌言遣觀察支使鄭蒙上疏請誅
彬等優詔褒答召拜御史中丞太宗宴金明池特詔預
焉憲官從宴自昌言始也河東用兵樞密副使張宏循
默守位昌言多條上邊事太宗卽以昌言爲左諫議大
夫代宏爲樞密副使遷工部侍郎時鹽鐵副使陳象輿
與昌言善知制誥胡旦度知副使董嚴皆昌言同年右
正言梁顥嘗在大名幕下四人者日夕會昌言之第京
師爲之語曰陳三更董半夜有傭書翟穎性險誕與旦
狎旦爲作大言之辭使穎上之爲穎改姓名馬周以爲
唐馬周復出也其言多毀時政自薦爲大臣及歷舉數

十人皆公輔器。期昌言爲內應。陳王尹開封廉知以聞。詔捕穎繫獄。鞠之盡得其狀。昌言坐貶崇信軍節度行軍司馬。穎杖脊黥面流海島。禁錮終身。初太宗厚遇昌言。垂欲相之。趙普以勲舊復入。惡昌言剛戾。乃相呂蒙正。裁數月。會有穎獄。普以昌言樹黨。再勸太宗誅之。太宗特寬焉。淳化二年。起昌言知蔡州。逾年。召拜右諫議大夫。或議弛茶鹽禁。以省轉漕。命昌言爲江淮兩浙制置茶鹽使。昌言極言非便。太宗不納。趣昌言往。昌言固執如初。卽以戶部副使雷有終代之。卒以無利而罷。昌言復知天雄軍。賜錢二百萬。大河貫府境。豪民時芻茭。

圖利誘姦人潛穴隄防歲仍決溢昌言知之一日隄吏告急命徑取豪家厝積以給用自是無敢爲姦利者屬澶州河決流入御河漲溢浸府城昌言籍府兵負土增隄數不及千乃索禁卒佐役皆偃蹇不進昌言怒曰府城將墜人民且溺汝輩食厚祿欲坐觀邪敢不從命斬衆股慄赴役不浹旬城完太宗手詔褒諭之召拜給事中叅知政事俾乘疾置以入卽赴中書時京城連雨昌言請出廐馬分牧外郡或以盛秋備敵馬不可闕昌言曰塞下積水敵必不至太宗從之未幾王小波李順構亂於蜀議遣大臣撫慰昌言獨請發兵無使滋蔓廷論

未決。會嘉眉連陷。始命王繼恩等分路進討。昌言攝祭太廟宿齋中。因召對滋福殿。復贊兵計。遂遣使督繼恩戰。繼恩御衆寡術餘寇未殄。握兵留成都。士無鬪志。郡縣復有陷者。太宗意頗厭兵。召昌言謂曰。西川本自一國。太祖平之。訖今三十年矣。昌言知意。卽前指畫攻取之策。太宗喜。命昌言爲川峽五十二州招安行營馬步軍都部署。昌言懇辭。敦諭不許。賜精鎧良馬。白金五千兩。別賜手札數幅。皆討賊方畧。自繼恩以下並受節度。旣行。有奏昌言無嗣。鼻折山根。頗有反相。不宜遣握兵入蜀。後旬日。召宰相於北苑門。曰。昨令昌言入蜀。朕思

之有所未便。且蜀賊小醜。昌言大臣未易前進。且令駐鳳翔。止遣內侍衛紹欽齎手書指揮軍事。亦可濟也。詔書追及昌言。已至鳳州。留候館百餘日。賊平。改戶部侍郎。罷政事。知鳳翔府。徙澶涇。延三州。真宗卽位。遷兵部侍郎。知陝州。表求還京。不許。未幾。移知永興軍。咸平三年。與呂蒙正寇準同召。以本官兼御史中丞。知審官院。有言門資官不宜任親民。昌言手疏。以才不才在人。豈以寒雋世家爲恨。遂罷其議。加工部尙書。仍兼中丞。先時多遣臺吏巡察羣臣踰越法式者。昌言建議。請準故事。令左右巡使分領之。會知審刑院趙安仁判大理寺。

韓國華斷獄失中解職昌言因上言詳斷官宜加慎擇自今有議刑不當嚴示懲罰授以遠官若有罪被問不卽引伏者許令追攝又天下大辟斷訖皆錄款聞奏付刑部詳覆用刑乖理者皆行按劾惟開封府未嘗奏案或斷獄有失止罪元勘官吏知府判官推官檢法官皆不及責則何以辯明枉濫表則方夏望自今如外州例施行從之會孟州民常德方訟臨津尉任懿以賄登第事下御史乃知舉王欽若受之昌言以聞欽若自訴詔邢曷覆案坐昌言故入奪官貶安遠軍行軍司馬移武勝軍景德初拜刑部侍郎求兼三館職命判尚書都省

真宗幸澶淵以盟津居要增屯兵命知河陽歷知天雄軍府境內有小盜昌言榜諭能告執者給賞牙吏卽遷職樞密使王繼英以爲小盜不當擅爲賞格乃訪昌言易其榜有勞者俟朝旨未幾徙知鎮州遷戶部侍郎大中祥符二年卒年六十五贈吏部尙書謚曰景肅錄其子慶嗣爲國子監丞賦祿終喪姪孫允明同學究出身昌言喜推獎後進掌漕湖外時李沆通判潭州昌言謂有台輔之量表聞於朝王旦宰岳州平江昌言一見識其遠大以女妻之後皆爲賢相王禹偁自卑秩擢詞職亦昌言所薦也昌言強力尙氣槩當官無所顧避所至

以威斷立名雖屢經擯斥未嘗少自抑損然剛愎縱率對僚吏倨慢時論以此少之慶嗣至太子洗馬

楊團練使瓊汾州西河人幼事馮繼業以材勇稱太宗召置帳下卽位隸御龍直三遷神勇指揮使從征太原以勞補御龍直指揮使雍熙初改弩直都虞侯兼御前忠佐馬步都軍頭領顯州刺史淳化中李順叛蜀瓊往夔峽擒賊招安領兵自峽上與賊遇累戰抵渝合與尹元裴莊分路進討克資普二州雲安軍斬首數千級詔書嘉獎遣使卽軍中真拜單州刺史至道初召還供職明年徙知霸州兼鈐轄未幾改防禦使靈慶路副都部

署河外都巡檢使賊累寇疆瓊固捍有功導黃河溉民
田數千頃敗賊於合河鎮北獲人畜無算賊騎五百掠
城下擊破之追北三十里並賜詔嘉諭咸平二年命爲
涇原儀渭邠寧環慶清遠軍靈州路副都部署尋徙鎮
定高陽關三路押策先鋒屯定州之北明年副王超爲
鎮州都部署再遷環慶徙定州四年召還以鄜州觀察
使充靈環十州軍副都部署兼安撫副使嘗遣使諭旨
賊若寇清遠及青岡白馬寨卽合兵與戰是秋果長圍
清遠頗積石河清遠屢走間使詣瓊請師瓊將悉出兵
爲援鈴轄內園使馮守規都監崇儀使張繼能曰敵近

重兵在前。繼無以進。不可悉往。乃止。命副部署海州團練使藩璘。都監西京右藏庫劉文質。率兵六千赴之。寇鼓兵攻南門。其子阿移攻北門。堙濠斷橋以戰。瓊遣鈐轄李讓督精卒六百往援。至則城陷矣。賊泊青岡城下。順州刺史王瓌普謂瓊曰。青岡地遠水泉。非屯師計。願棄之。瓊合謀焚芻糧。兵仗驅老幼以出。退保洪德寨。寇威浸熾。未嘗交一鋒。事聞於上。傳召瓊繫御史獄。治罪當死。兵部尙書張齊賢等議請如律。詔特貸。命削官流崖州。明年移道州。景德初起爲右領軍衛將軍。分司西京。累遷左領軍衛大將軍。領賀州團練使。知兗州。有州

卒自言得神術能飛行空中州人頗惑瓊捕至折其足
奏戮之五年卒年六十七錄其子舜臣爲奉職長子舜
賓內殿崇班閣門祗候

李都監渭字師望汾州西河人後家河陽進士起家爲
臨潁縣主簿累官至太常博士會河決滑州天聖初上
治河十策叅知政事魯宗道奉詔行河奏渭換北作坊
副使與張君平並爲脩河都監未幾皆罷以渭爲鄆州
兵馬都監徙知憲州又知鳳州兼階成州鈐轄初屬戶
寇陷階州沙灘寨渭至詰所以然者乃都校趙釗擾之
奏流釗道州以恩信諭酋帥復其寨遷軍器庫副使歷

知原環慶三州時詔舉勇畧任邊者李諮以渭應詔徙
益利路兵馬鈐轄領惠州刺史遷東八作使擢西上閤
門使徙鄜延路再遷四方館使寶元元年元昊將山遇
率其族來歸且言元昊反狀渭與知州郭勸謀卻之既
而元昊果反又與勸奏以爲元昊表至猶稱臣可漸屈
以禮朝廷初以渭兼知鄜州坐是貶爲尙食使知汝州
徙磁州元昊犯邊言者益歸罪於渭復降右監門衛將
軍白波兵馬都監卒

曹元帥玠字帝錫汾州介休人仁宗朝建節開封遼夏
不敢犯以功授總理大元帥慶歷三年卒勅賜祭葬

狄武襄青字漢臣汾州西河人善騎射初隸騎御馬直
選爲散直寶元初趙元昊反詔擇衛士從邊以青爲三
班差使殿侍延州指使時偏將屢爲賊敗士卒多畏怯
青行常爲先鋒凡四年前後大小二十五戰中流矢者
八破金湯城畧宥州屠囉咩歲香毛奴尙羅慶七家口
等族燔積聚數萬收其帳二千三百生口五千七百又
城橋子谷築招安豐林新寨大郎等堡皆扼賊要害嘗
戰安遠被創甚聞寇至卽挺起馳赴衆爭前爲用臨敵
被髮帶銅面具出入賊中皆披靡莫敢當尹洙爲經畧
判官青以指使見洙與談兵善之薦於經畧使韓琦范

仲淹曰此良將材也二人一見奇之待遇甚厚仲淹以左氏春秋授之曰將不知古今匹夫勇爾青折節讀書悉通秦漢以來將帥兵法由是益知名以功累遷西上閣門副使擢秦州刺史涇原路副都總管經畧招討副使又加捧日天武四廂都指揮使惠州團練使仁宗以青數有戰功欲召見問以方畧會賊寇渭州命圖形以進元昊稱臣徙真定路副都總管歷侍衛步軍殿前都虞侯眉州防禦使遷步軍副都指揮使保大安遠二軍節度觀察留後又遷馬軍副都指揮使青奮行伍十餘年而貴是時面涅猶存帝嘗勅青傳藥除字青指其面

日陛下以功擢臣。不問門地。臣所以有今日。由此涅爾。臣願留以勸軍中。不敢奉詔。以彰化軍節度使知延州。權樞密副使。皇祐中。廣源州蠻儂智高反。陷邕州。又破沿江九州。圍廣州。嶺外騷動。楊畧等安撫經制蠻事。師久無功。又命孫沔余靖爲安撫使討賊。仁宗猶以爲憂。青上表請行。翌日入對。自言臣起行伍。非戰伐無以報國。願得蕃落騎數百。益以禁兵。羈賊首致闕下。帝壯其言。遂除宣徽南院使。宣撫荆湖南北路。經制廣南盜賊事。置酒垂拱殿以遣之。時智高還據邕州。青合孫沔余靖兵次賓州。先是蔣偕張忠皆輕敵敗。使軍聲大沮。青

戒諸將毋妄與賊鬪。聽吾所爲。廣西鈐轄陳曙乘青未至。輒以步卒八十犯賊。潰於崑崙關。殿直袁用等皆遁。青曰。令之不齊。兵所以敗。晨會諸將堂上。揖曙起。并召用等三十人。按以敗亡狀。驅出軍門。斬之。沔靖相顧。曙貽諸將股票。已而頓甲。令軍中休十日。覘者還。以爲軍未卽進。青明日乃整軍騎。一晝夜絕崑崙關。出歸仁鋪。爲陣。賊旣失險。悉出逆戰。前鋒孫節搏賊死山下。賊氣銳甚。沔等懼失色。青執白旗麾騎兵。縱左右翼出。賊不意。大敗之。追奔五十里。斬首數千級。其黨黃師宓儂建中智中及僞官屬死者五十七人。生擒賊五百餘人。智

高夜縱火燒城遁去。遲明青按兵入城，獲金帛鉅萬，雜畜數千，招復老壯七千二百，嘗爲賊所俘脅者，慰遣之。裒黃師宓等邕州城下，斂屍築京觀於城北隅。時賊屍有衣金龍衣者，衆謂智高已死，欲以上聞。青曰：「安知非詐邪？」寧失智高，不敢誣朝廷以貪功也。初，青之至邕也，會瘴霧昏塞，或謂賊毒水上流，士飲者多死。青殊憂之，一夕有泉湧寨下，汲之甘。衆遂以濟，復爲樞密副使，遷護國軍節度使。河中尹還至京師，帝嘉其功，拜樞密使，賜第敦敦坊，優進諸子官秩。初，青旣行，帝每憂之，曰：「青有威名，賊當畏其來。」左右使令非青親信者不可，雖飲

食卧起皆宜防竊發乃馳使戒之及聞青已破賊顧宰相曰速議賞緩則不足以勸矣始交趾願出兵助討智高余靖言其可信具萬人糧於邕欽待之詔以緡錢三萬賜交趾爲兵費許賊平厚賞之青旣至檄余靖無通使假兵卽上奏曰李德政聲言將步兵五萬騎一千赴援非其情實且假兵於外以除內寇非我利也以一智高而橫蹂二廣力不能討乃假兵蠻夷蠻夷貪得忘義因而起亂何以禦之請罷交趾助兵從之賊平人服其有遠畧青在樞密四年每出土卒輒指日以相矜誇又言者以青家狗生角且數有光怪請出青於外以保全

之不報嘉祐中京師大水青避水徙家相國寺行止殿
上人情頗疑迺罷青爲同中書門下平章事出判陳州
明年二月疽發髭卒帝發哀贈中書令謚武襄青爲人
慎密寡言其計事必審中機會而後發行師先正部伍
明賞罰與士同飭寒勞苦雖敵猝犯之無一士敢後先
者故其出常有功尤喜推功與將佐始與孫沔破賊謀
一出青賊旣平經制餘事悉以委沔退若不用意者沔
始歎其勇旣而服其爲人自以爲不如也尹洙以貶死
青悉力贖其家事子諮詠並爲閤門使詠數有戰功熙
寧元年神宗考次近世將帥以青起行伍而名動夷夏

深沉有智畧能以畏慎保全終始慨然思之命取青畫像入禁中御制祭文遣使賫中牢祠其家

文潞公彥博字寬夫汾州介休人其先本敬氏以避晉高祖宋翼祖諱改焉少與張昇高若訥從潁昌史炤學炤母異之曰貴人也待之甚厚及進士第知翼城縣通判絳州爲監察御史轉殿中侍御史四方用兵偏校有臨陳先退望敵不進者大將守著令皆申覆彥博言此可施之平居無事時爾今擁兵數十萬而將權不專兵法不肅將何以濟仁宗嘉納之黃德和之誣劉平降虜也以金幣賂平奴使附已說以證平家二百口皆械繫

詔彥博置獄於河中。鞠治得實。德和黨援盛謀。翻其獄。至遣他御史來。彥博拒不納。曰。朝廷慮獄不就。故遣君。今案具矣。宜亟還事。或弗成。彥博執其咎。德和并奴卒就誅。以直史館爲河東轉運副使。鄜州餉道回遠。銀城河外。有唐時故道。廢弗治。彥博父洎爲轉運使。日將復之。未及而卒。彥博嗣成父志。益儲粟。元昊來寇。圍城十日。知有備。解去。遷天章閣待制。都轉運使。連進龍圖閣。樞密直學士。知秦州。改益州。嘗擊毬鈐轄廨。聞外喧甚。乃卒長杖一卒不伏。呼入問狀。令引出與杖。又不受。復呼入斬之。竟毬乃歸。召拜樞密副使。叅知政事。貝州王

則反明鎬討之久不克彥博請行命爲宣撫使旬日賊潰檻則送京師拜同中書門下平章事集賢殿大學士薦張瓌韓維王安石等恬退守道乞褒勸以勵風俗與樞密使龐籍議省兵凡汰爲民及給半廩者合八萬論者紛然謂必聚爲盜帝亦疑焉彥博曰今公私困竭正坐兵冗脫有難臣請死之其策訖行歸兵亦無事進昭文館大學士御史唐介劾其在蜀日以奇錦結宮掖因之登用介旣貶彥博亦罷爲觀文殿大學士知許州改忠武軍節度使知永興軍至和二年復以吏部尙書同中書門下平章事昭文館大學士與富弼同拜士大夫

皆以得人爲慶。三年正月，帝方受朝，疾暴作，扶入禁中。彥博呼內侍史志聰問狀，對曰：「禁密不敢漏言。」彥博叱之曰：「爾曹出入禁闥，不令宰相知天子起居，欲何爲邪？」自今疾勢增損，必以告，不爾當行軍法。又與同列劉沆、富弼謀啓醺大慶殿，因留宿殿廬。志聰曰：「無故事。」彥博曰：「此豈論故事時邪？」知開封府王素夜叩宮門上變，不使人入。明旦言有禁卒告都虞侯欲爲亂，沆欲捕治，彥博召都指揮使許懷德問都虞侯何如人。懷德稱其愿可保。彥博曰：「然則卒有怨誣之耳。」當亟誅之以靖衆，乃請沆判狀尾斬於軍門。先是弼用朝士李仲昌策自澶州

商湖河穿六深渠入橫隴故道北京留守賈昌朝素惡
弼陰約內侍武繼隆令司天官二人俟執政聚時於殿
庭抗言國家不當穿河於北方致上體不安彥博知其
意有所在然未有以制之後數日二人又上言請皇后
同聽政亦繼隆所教也史志聽以其狀白執政彥博視
而懷之不以示同列而有喜色徐召二人詰之曰汝今
日有所言乎曰然彥博曰天文變異汝職所當言也何
得輒預國家大事汝罪當族二人懼色變彥博曰觀汝
直狂愚耳未忍治汝罪自今無復然二人退乃出狀示
同列同列皆憤怒曰奴敢爾僭言何不斬之彥博曰斬

之則事彰灼於中宮不安衆皆曰善旣而議遣司天官
定六課方位復使二人往繼隆白請留之彥博曰彼本
不敢妄言有教之者耳繼隆默不對二人至六課恐治
前罪更言六課在東北非正北也帝疾愈彥博等始歸
第當是時京師業業賴彥博弼持重衆心以安沆密白
帝曰陛下違豫時彥博擅斬告反者彥博聞之以沆判
呈帝意乃解御史吳中復乞召還唐介彥博因言介頃
爲御史言臣事多中臣病其間雖有風聞之誤然當時
責之太深請如中復奏時以彥博爲厚德久之以河陽
三城節度使同平章事判河南府封潞國公改鎮保平

判大名府。又改鎮成德。遷尙書左僕射。判太原府。俄復鎮保平。判河南。丁母憂。英宗卽位。起復成德軍節度使。三上表乞終喪。許之。初。仁宗之不豫也。彥博與富弼等乞立儲嗣。仁宗許焉。而後宮將有就館者。故其事緩。已而彥博去位。其後弼亦憂去。彥博旣服闋。復以故官判河南。有詔入覲。英宗曰。朕之立。卿之力也。彥博竦然對曰。陛下入繼大統。乃先帝聖意。皇太后協贊之力。臣何力之有。兼陛下登儲纂極之時。臣方在外。皆韓琦等承聖志。受顧命。臣無與焉。帝曰。備聞始議卿於朕有恩。彥博遜避不敢當。帝曰。暫煩西行。卽召還矣。尋除侍中。徙

鎮淮南判永興軍入爲樞密使劍南西川節度使熙寧
二年相陳升之詔彥博朝廷宗臣其令升之位彥博下
以稱遇賢之意彥博曰國朝樞密使無位宰相上者獨
曹利用嘗在王曾張知白上臣忝知禮義不敢效利用
所爲以素朝著固辭乃止夏人犯大順慶帥李復圭以
陳圖方畧授鈐轄李信等趣使出戰及敗乃妄奏信罪
彥博暴其非宰相王安石曲誅信等秦人寃之慶州兵
亂彥博言於帝曰朝廷行事務合人心宜兼采衆論以
靜衆爲先陛下屬精求治而人心未安蓋更張之過也
祖宗法未必皆不可行但有偏而不舉之敝爾安石知

爲已發奮然排之曰求去民害何爲不可若萬事隳墜
乃西晉之風何益於治御史張商英欲附安石撫樞密
使他事以搖彥博坐不實貶彥博在樞府九年又以極
論市易司監賣果實損國體歛民怨爲安石所惡力引
去拜司空河東節度使判河陽徙大名府身雖在外而
帝眷有加時監司多新進少年轉運判官汪輔之輒奏
彥博不事事事帝批其奏以付彥博曰以侍中舊德故煩
卧護北門細務不必勞心輔之小臣敢爾無禮將別有
處置未幾罷去初選人有李公義者請以鐵龍瓜治河
宦者黃懷信沿其制爲濬川杷天下指笑以爲兒戲安

石獨信之遣都水丞范子淵行其法子淵奏用杷之功
水悉歸故道退出民田數萬頃詔大名核實彥博言河
非杷可濬雖甚愚之人皆知無益臣不敢雷同罔上疏
至帝不悅復遣知制誥熊本等行視如彥博言子淵乃
請覲言本等見安石罷意彥博復相故傅會其說御史
蔡確亦論本奉使無狀本等皆得罪獨彥博勿問尋加
司徒元豐二年拜太尉復判河南於是王同老言至和
中議儲嗣事彥博適入朝神宗問之彥博以前對英宗
者復於帝曰先帝天命所在神器有歸實仁宗知子之
明慈聖擁佑之力臣等何功帝曰雖云天命亦繫人謀

卿深厚不伐善陰德如丙吉真定策社稷臣也彥博曰如周勃霍光是爲定策自至和以來中外之臣獻言甚衆臣等雖嘗有請弗果行其後韓琦等訖就大事蓋琦功也帝曰發端爲難是時仁宗意已定嘉祐之末止申前詔爾正如丙吉霍光不相拚也遂加彥博兩鎮節度使辭不拜將行賜宴瓊林苑兩遣中謁者遺詩祖道當世榮之王中正經制邊事所過稱受密旨募禁兵將之而西彥博以無詔拒之中正亦不敢募而去久之請老以太師致仕居洛陽元祐初司馬光薦彥博宿德元老宜起以自輔宣仁后將用爲三省長官而言事者以爲

不可乃命平章軍國重事六日一朝一月兩赴經筵恩禮甚渥然彥博無歲不求退居五年復致仕紹聖初張惇秉政言者論彥博朋附司馬光詆毀先烈降太子少保卒年九十二崇寧中預元祐黨籍後特命出籍追復太師謚曰忠烈彥博逮事四朝任將相五十年名聞四夷元祐間契丹使邪律永昌劉霄來聘蘇軾館客與使人覲望見彥博於殿門外却立改容曰此潞公也邪問其年曰何壯也軾曰使者見其容未聞其語其綜理庶務雖精練少年有不如其貫穿古今雖專門名家有不逮使者拱手曰天下異人也既歸洛西羌首領溫溪心

有名馬請於邊吏願以餽彥博詔許之其爲外國所敬如此彥博雖窮貴極富而平居接物謙下尊德樂善如恐不及其在洛也洛人邵雍程灝兄弟皆以道自重賓接之如布衣交與富弼司馬光等十三人用白居易九老會故事置酒賦詩相樂序齒不序官爲堂繪像其中謂之洛陽耆英會好事者莫不慕之神宗導洛通汴而主者過絕洛水不使入城中洛人頗患苦之彥博因中使劉惟簡至洛語其故惟簡以聞詔令通行如初遂爲洛城無窮之利彥博八子皆歷要官第六子及甫初以大理評事直史館與邢恕相善元祐初爲吏部員外郎

以直龍圖閣知同州彥博平章軍國及甫由右司員外郎引嫌改衛尉光祿少卿彥博再致仕及甫知河陽召爲太僕卿權工部侍郎罷爲集賢殿脩撰提舉明道宮蔡渭邪恕持及甫私書造梁燾劉摯之謗逮詣詔獄及甫有憾於元祐從而實之亦坐奪職未幾復官卒

郝武莊質字景純汾州介休人少從軍挽彊爲第一充殿前行門換供奉官爲府州駐泊都監主管麟府軍馬與田朮將兵護軍須餽麟州道遇西夏數千騎寇鈔質先驅力戰斬首獲馬數百又與朮行邊至柏谷敵塹道以阻官軍質禦之於寒嶺下轉鬪逐北遂修復寧遠諸

棚以扼賊衝宣撫使杜衍安撫使明鎬連薦之且條上前後功狀超遷內殿承制并代路都監賈昌朝又薦爲大名路鈐轄使討貝州文彥博至命部城西回河上有亭甚壯彥博慮爲賊焚遣小校藺千守而質使千往他營度戰貝千辭質曰亭焚吾任其責千去而亭焚彥博將斬千質趨至帳下曰千之去質實使之罪乃在質願代千死彥博壯其義兩釋之質自此益知名賊平遷六宅使歷高陽關定州并代鈐轄駐泊副都部署龍神衛捧日天武都指揮使馬軍殿前都虞侯加領賀州刺史英州團練眉州防禦使奉詔城豐州進步軍副都指揮

使宿州觀察使召還宿衛改馬軍英宗立遷武昌軍節度觀察留後加安德軍節度使爲殿前副指揮使神宗立易節度武軍爲都指揮使元豐元年卒帝親臨其喪贈侍中謚曰武莊質御軍有紀律犯者不貸而享犒豐渥公錢不足出已俸助之平居自奉簡儉食不重肉篤於信義田拙不振而死爲表揭前功官其一孫在并州與朝士董熙善約爲婚姻熙死家貧無依質已爲節度使竟以女歸董氏

郝中允戴字伯牙石州定胡人家貧竭力營養或憐傷之貸以錢數百萬使取息自贍戴重謝留錢五六年不

用復返之舉進士調宛邱尉舞陽主簿通山令時年未五十以父樵老不第上書請致仕爲父求官執政諭使赴官而後請曰如是則可升朝籍遇恩及親矣於是留妻子於家獨奉父行踰歲竟謝事上官以其治縣有績惜其去固留之耆老拜庭遮道皆不能止得太子中允以歸未至鄉里而樵卒自畚土造冢人有助之者使置土冢上去則隨撤之服除州以狀聞詔賜粟帛治平末以翰林學士呂公著薦起爲奉寧軍推官涇原經畧使亦奏辟幕府戴曰向所以未老致仕欲官及親也旣不能及尙庶幾以恩待贈今則無及矣姻族語其妻聶氏

使勸賊仕曰吾不德無以助君子矧敢強其所不欲以累其高哉聶事舅姑亦以孝義著賊忠信自將篤行苦節不仕而卒司馬溫公爲銘其墓

王防禦使奇汾州人武舉中第章惇經營湖北溪洞以爲將領降其酋舒亢貴縛元猛平懿洽等州累遷加京副使爲湖南都監徙廣西宣州蠻寇邊奇領兵至天河縣期旦日會戰裨將費萬夜以衆竊出河泥隘戰沒經畧使移書遺奇奇不能堪後數日蠻萬人驟集奇輕出遂敗麾下猶數百人勸策馬逃去奇罵曰大丈夫當盡節以報國何走爲戰而死詔贈皇城使忠州防禦使官

其家六人仍賜金帛

王節度使忠植石州人紹興九年金將斜卯阿里攻石州粘割胡撒率所部登城陷之十年秋忠植舉兵復石州等十一郡授武功大夫華州觀察統制河東忠義軍馬遂知代州尋落階官爲建寧軍承宣使龍神衛四廂都指揮使河東經畧安撫使明年金人圍慶陽急帥臣宋萬年乘城拒守會川陝宣撫副使胡世將檄忠植以所部赴陝西會合行次延安叛將趙惟清執忠植使拜詔忠植曰本朝詔則拜金國詔則不拜惟清械詣其右副元帥撒離曷不能屈使甲士引詣慶陽城下諭使降

忠植大呼曰我河東步佛山忠義人也爲金人所執使來招降願將士勿負朝廷堅守城壁忠植卽死城下撒離曷怒詰之忠植披襟大呼曰當速殺我遂遇害世將上其事贈奉國軍節度使開府儀同三司官其家十人宋史於忠植傳云太行義士也蓋考之未審

宋知浹汾州人通左氏春秋好直言岳飛以賓客待之飛初下吏知浹上書聲其冤流袁州

元象汾州孝義人有孝行嘗耕於六壁城下其地有陂土人因呼爲元象泊

任康節汾州西河人有孝行

舊志稱康節少遊學。祖母李氏思之。因急歸。不復出。祖母歿。躬爨以養。祖父案元象任康節。其始末皆無考。姑據舊志錄之。

右宋十六人。舊志列王嗣宗。田紹斌。楊瓊。李渭。狄青。李浩。王奇。侯延廣。郝質。文彥博。趙叡。趙昌言。辛仲甫。元象。郝賤。十五人。王嗣宗。田紹斌。李浩。別見仕實。趙叡。卽見昌言傳。山西通志所列。多據州縣志採入。而正史中其人行事卓卓。轉或失之。自宋以下。凡去取雖未當。非有關考覈者。不復具論。以省繁衍。

張鼎起。字傳霖。汾州人。爲國子助教。免歸。盜陷汾州。鼎

起與妻赴井死。

右金一人舊志列馬天來吳希尹二人別見仕實。

梁天翔字飛卿汾州平遙人瑛之季子少磊砢便騎射讀書能通大義以文階起年十八尹本縣中統五年授懷孟路總管至元九年尹介休遷知郢州州初附不逞之徒相聚爲盜捕首惡杖殺之餘釋不問授簽嶺南廣西道按察司事摘奸發伏郡邑以寧遷廣東道提刑按察副使改四川按察副使歲饑請發廩以賑主者議上聞天翔日報下則民殍矣遂發糧四萬斛賑之二十六年雲南行御史臺授朝列大夫侍御乘傳上切治體者

二十餘事。世祖深嘉納焉。授吏部侍郎。會高麗饑。制以天翔往賑。還授成都路總管。改四川道肅政廉訪使。卒年五十有五。追封安定郡侯。

杜思忠字彥甫。汾州平遙人。祖父珪好施與。以長者稱於鄉。父豐。沁州長官。贈沁陽公。思忠討高麗有功。授承務郎。洪陽固鎮鐵冶。提舉思忠曰。鹽鐵之政。古人所鄙。營利之術。非余之能。辭官歸。人稱其高節。

杜文定思敬字敬甫。汾州平遙人。思忠之弟也。受學許魯齊之門。累官御史臺都事。轉治侍御史。除戶部侍郎。歷左右司郎中。出爲順德安西總管。簽陝西中書省。移

汴梁總管復入爲侍御史拜中書參知政事進四川行省左丞不赴致仕年八十六卒謚文定立朝有風節

呂簡肅沆字蒙甫汾州西河人少讀書曉達義理以國語文字爲廣平大名教授薦歷江南諸道行御史臺監察御史首上疏條八事糾貪懦之吏殲蜀寇之兵天歷初由南臺都御史僉海北海南道廉訪司使所至興學校正風俗斷疑獄弭盜寇詔加亞中大夫丁父憂服除起爲襄陽總管本路諸軍與魯總管政績甚著授大中大夫大明路總管兼府尹本路諸軍總管內勸農事知河防事會臺議宿望擢拜嘉議大夫海北海南道肅政

廉訪使卒於官贈禮部尚書封河東郡侯謚簡肅
柳誠汾州西河人爲國子監助教有學守

王天祺字秋岩汾州西河人孝友能文徵教職舉茂異
皆辭疾不赴門人李峽等爲之立碑

李進士邦用汾州介休人少有大志不泥俗學孝弟出
於天性其行已教人一以孝弟爲先時望歸之

鈕汾陽伯克讓汾州介休人歷岳州武昌二郡推官用
法平恕守龍陽郡多善政州人勒石頌之終宣慰副使
追封汾陽郡伯

鄭衛公允中石樓人元進士累官浙東廉訪使進家宰

封衛國公

縣志稱其德被生民功在社稷而事實絕不聞今據縣志列之

褚忠肅不華字君實石樓人沉默有器局泰定初以廷試第二補中瑞司驛史授海道副千戶轉嘉興路治中連拜南臺西臺監察御史遷河西道廉訪僉事移淮東未幾擢副使汝穎盜發勢張甚不華行郡至淮安極力爲守禦計賊至多所斬獲且請知樞密院老章判官劉甲守韓信城相犄角爲聲援復上章劾總兵及諸將逗撓之罪朝廷錄其功陞廉訪使階中奉大夫甲有智勇

與賊戰輒勝。賊憚之。號曰劉鐵頭。不華頗賴之。總兵者聞不華効已。益恚嫉。乃檄甲別將兵擊賊。冀以困不華。甲去。韓信城陷。旣而天長青軍叛。普顏帖本爾所統黃軍復叛。賊皆挾之來攻。不華知事危。退入哈刺章營。賊稍引去。乃出抵楊村橋。賊奄至。殺廉訪副使。不達失里。不華以餘兵入淮安。時城之東西南三面皆賊。惟北門通沐陽。阻赤鯉湖。指揮使魏岳陽遲駐兵沐陽。淮安倚其芻餉。而赤鯉湖爲賊據。沐陽之路又絕。賊計孤。城可取。進柵南鎖橋。不華與元帥張存義出大西門。會僉事忽都不華兵突賊柵。殊死戰。賊敗走。追北二十餘里。城

中食且絕。元帥吳德琇運糧萬斛入河爲賊所掠。德琇僅以身免。賊與青軍攻圍日益急。總兵者屯下邳。相去五百里。按兵不出。凡遣使十九輩告急。皆不聽。城中食草木螺蛤魚蛙燕烏及韡皮鞍轡革箱敗弓之筋皆盡。撤屋爲薪。人多露處。坊陌生荆棘。至正十六年十月乙丑。城陷。不華據西門力鬪。中傷見執。爲賊所脅。不華守淮安五年。殆數十百戰。精忠大節。人比之張許。朝廷聞之。贈翰林學士。承旨榮祿大夫柱國。追封衛國公。謚曰忠肅。賻鈔二百錠以卹其家。

褚伴哥。忠肅之次子也。隨父守淮安。城陷。父子力戰。及

父中傷伴哥冒刃救護被殺

車世榮石州人以孝行旌州志但言其官鳳翔路陰陽教授無事實可考

右元十二人舊志列杜豐杜思明杜思敬呂流張益李邦用王珪王仲文鈕克讓袁湘陳資壽高岡十二人杜豐杜思明張益王珪王仲文袁湘別見仕實陳資壽本錦州永樂人高岡別見名宦

汾州府志卷之十五

人物三

辛彥博汾州人初名彥德洪武中貢入太學高皇帝賜
今名旋授監察御史秩滿遷浙江按察使以註誤左遷
復除監察御史尋擢都察院左僉都御史改詹事府詹
事上書忤旨降山東按察使以保舉違例再降雲南布
政司叅政遷浙江按察使永樂初以擅責寧波衛指揮
陳仲禮謫戍興州未幾召還復除監察御史補福建布
政司右叅議伴送瓜哇使臣赴行在帝顧謂廷臣曰此
先帝所嘗器重者卽授浙江左布政使賜鈔五十錠因

乞省墳墓得旨驛歸後卒於官彥博居官四十年持守清正不營田宅及喪歸子孫貧甚鄉人言爲官清苦者必以彥博爲稱首

李鳳臯平遙縣人洪武中舉賢良方正知榆社縣有政聲

梁卞介休縣人洪武十三年由通經儒士授本縣訓導施教有方尤諳治體辛彥博器之薦擢御史病卒

張俱平遙縣人洪武丙子舉人性端嚴言動不苟初除磁州判官以廉能著擢左春坊司直郎侍皇太子讀書朝夕勸導以聲色寶玩最易喪志上聞賜荆杖勞之未

幾謝事去。後屢行徵辟。卒不起。

曹輿。介休縣人。永樂辛卯進士。授行人。博通諸史。名重當時。以病歸。止騎一驢。行李蕭然。

武允。介休縣人。永樂丁酉舉人。通明五經。博覽羣籍。恒以啟迪後進爲心。歷寧遠。盧龍二縣教諭。所至有聲。士多被成就。尋乞致仕。鄉後學翕然宗之。

王潤。介休縣人。宣德乙卯進士。知威縣。有善政。祀威縣名宦。

柴莊。汾州人。宣德末。知金縣。廉正愛民。秩滿。百姓保留。增俸。復知縣事。

楊昇字伯起寧鄉縣人正統戊午舉人官彰德府訓導遷遼東教授有學行在官在鄉俱多所成就

董瑾字文玉介休縣人正統十三年以貢生爲陝西甘肅中護衛經歷性剛直有廉操時有貴宦膝蛟妹以不孝詞投瑾瑾不少恕御史李某受屬於蛟轉屬瑾不聽卒置之法

王約寧鄉縣人正統中知定州善撫民時官軍逐寇糧芻不給設法厝置事濟而民不擾擢浙江鹽運同知楊智介休縣人少喪父三年中未嘗見其喜笑母喪哀毀廬墓有白兔馴擾人謂孝感所致正統中旌其門

武琦介休縣人景泰庚午舉人少居母喪廬墓時有橫軍作亂琦守墓不避賊入其廬見書數卷外無長物曰孝子也去之後官陝西肅府審理正

任義平遙縣人景泰庚午舉人篤於孝執喪廬墓三年知真寧鞏二縣以清正愛民稱民立遺愛碑

龐輔寧鄉縣人景泰丙子舉人成化十四年知涇陽縣改三原縣有異政擢知階州輔持行清約致仕歸鄉黨重之三原縣祀名宦

李穎平遙縣人天順己卯舉人授兗州府通判清介自持祈禱輒應民作清泉詩以歌之祭酒王雲鳳服其廉

謂有太古風

董齡汾州人天順甲申進士選翰林院庶吉士歷河南按察司簽事四川按察司副使所至有廉能聲于文奎以舉人知玉田縣有父風

武賢字尚德孝義縣人性至孝母失明以舌餵之遂復明父母俱歿稍遠出必拜告墓自墓還倒行不見墓始已聞官司傳呼聲雖暗室亦拱立俟之後舉入太學天順中知元氏縣有訟者反覆理論之不加刑民皆相勸以訟爲耻庭清無事改知興平縣亦如元氏去任之日皆老弱泣送

李願平遙縣人。用志誠篤。孝聞鄉閭。成化乙酉舉人。官
鞏昌府通判。歲饑。勸富戶出粟以賑。全活甚衆。暇日課
農桑。教民務本。考績以寬廉著。民立碑建祠。凡二十餘
處。後遷溫州府同知。

李秀汾州人。成化戊子舉人。知樂安縣。清廉有異政。發
奸摘伏如神。在官七月而卒。樂安民祠祀之。

溫康字志潔。介休縣人。成化戊子舉人。詮選第一。授山
東濟南府同知。招撫流離。奏除民害。九年。遷知尋甸州。
轉知散江府。時土賊猖獗。莫能勦捕。廉至。殲其巨魁。餘
悉解散。廉以禮匡俗。政聲大著。徵江學校公署傾圯。皆

廉所修舉卒於官士民悲泣。

周儀孝義縣人成化辛卯舉人正德中官鄆縣教諭與諸生約鷄鳴就學課誦書史儀未雞鳴卽起正衣冠以待諸生多所成就秩滿轉保定府教授篤於訓迪一如鄆縣時。

馬驥介休縣人成化甲午舉人知寶坻縣臨事果斷不阿貴幸縣多皇莊草魚等廠中貴權倖時騷擾爲害驥請咨兵部出榜通行禁革一時頌聲徧滿道路。

支瑞介休縣人成化乙未進士授行人出使唐沈二府還以金帛却不受擢監察御史按畿甸時有中貴侵民

田前經理官得罪瑞按法平之併直經理者之冤權倖
悚然巡山東官舍有妖暗投瓦礫中傷人瑞至妖滅值
亢旱出祈禱卽雨降人咸異之後擢山東按察副使兵
備遼陽節操愈勵卒於官囊笥蕭然

車梁石州人成化中爲御史十五年條列時政中言東
廠錦衣衛所獲盜先嚴刑具成案然後送法司法司不
敢平反請自今徑送法司毋先刑訊章下未報主東廠
者言梁從父郎中霆先以罪爲東廠所發挾私妄言遂
下詔獄給事御史論救乃獲釋遷知漢陽府卒於官

車霆石州人成化辛丑進士官刑部主事歷至郎中霆

性慤直持己廉正與上官語是非無少回互出知平涼府吏胥奉法唯謹藩府宗室無敢以私干者蒞任八年遷陝西參政入爲苑馬寺正卿擢右僉都御史巡撫宣府修舉邊政實心有功績致仕歸以禮讓表俗

張翼介休縣人成化甲辰進士授刑部主事歷至郎中出知保寧府遷四川按察副使羌人屢肆劫掠督兵勦除悉警伏又遷貴州湖廣參政擢右僉都御史巡撫甘肅殫心區畫獲功十有六次西北賴之尋召入理院事未幾請告歸卒翼性耿介其居官清望最著

王錫石州人成化丙午舉人官洛川教諭性篤孝父輔

歿於山東扶柩而歸野宿不避雨雪既葬廬墓三年時
早霜殺禾塋左右獨不傷咸以爲孝感所致服闋補曹
縣母喪亦如之斷絕菜鹽形瘁骨立知州王道一再往
請之歸謝曰死塋前足矣竟卒

任良才平遙縣人成化丁未進士知江陰縣擢知高郵
州良才性孝至老不衰居官以清介稱

田籽汾州人宏治乙酉舉人知長清縣居官鯁直二介
不取其事親孝養誠至及親歿廬於墓所哀思骨立嘗
有早霜殺禾獨近墓禾不傷人以爲孝感之應族人多
化之鄉黨推重爲立忠孝祠與辛彥博並祀

賈璇汾州人宏治庚戌進士官戶部主事歷員外郎中
嘗督鈔揚州羨餘盡歸之官行賑江北調度有方所全
活甚衆正德初守國乞誅宦官劉瑾等不報出補陝西
右參議未幾爲瑾所陷而歸及瑾伏誅朝廷將欲大用
以目疾辭時論惜之

高崇熙石州人宏治庚戌進士官至四川巡撫廕世襲
錦衣衛千戶其事蹟湮失考正德六年二月諭都察院
右副都御史高崇熙勅有云今保寧江津等處殘賊復
聚爲患爾會同總兵官楊宏征勦藍五等餘黨同副總
兵王憲勦殺江津強賊朕念彼處地方四年用兵軍民

困憊已極。爾須加意撫恤。設法賑濟。存問疾苦。寬釋脅從。十年八月。贈右都御史高崇熙諡有云。事有定論。乃追念其前功。故都察院御史高崇熙。器識恢宏。性資莊重。累遷臬府。才猷振乎綱紀。兩擢藩司。政克宣夫德化。以蜀寇之未寧。致王師之見討。乃從僉議。晉陟中丞。彰國典以勵人心。飭兵機而鼓士氣。羣方漸息。藹歌頌之將興。三捷交馳。丕風聲之益振。顧其推誠待物。竭力保民。豈期釜內之魂。復有桺中之變。雖勢難再振。而功未全收。爰召北還。遂致中殞。十一年四月。諭祭文有云。爾性資敏達。器宇魁梧。發跡賢科。擢司風紀。歷官藩臬。綽

著能聲晉佐都臺往撫西蜀時因盜起受命臨戎捷報
既聞賊氛復熾事出不意遂致人言方在申誣胡遽淪
沒觀此則崇熙累官及功績大概可見第崇明官長垣
縣丞擢知邱縣亦有治績

石瓚介休縣人宏治壬子舉人知羅山縣時霸州流賊
猖獗鄰縣棄城走寄印於瓚者十一瓚孤城獨守鏖戰
月餘面中矢自拔去殺賊有功兵部奏請陞俸一級仍
管縣事招集流民撫恤備至知府出見羅山民呼而語
之曰汝等天堂上百姓邪擢萊州府通判羅山民立生
祠瓚以親老乞歸侍養遂不復仕方伯劉向可移檄嘉

之曰孤城獨守功活萬人巡按尙維持表其坊曰光生
冀北名著汝南帶管提學楊肩賢以忠臣第題其居
任良弼平遙縣人良才之弟宏治癸丑進士選翰林院
庶吉士授刑科左給事中轉吏科都給事中彈劾不避
權貴遷通政司左叅議忤宦官劉瑾降補建昌府通判
復矯詔下獄謫戍遼陽持節自如瑾誅起通政司右叅
議良弼居官三十年澹泊如諸生名重朝野及歿家惟
琴書

辛文淵字道深石州人宏治癸丑進士知濬縣丁母憂
服闋補固安縣遷知無爲州轉河間府同知忤宦官劉

瑾逮獄謫廣東化州同知未幾遷河南汝寧府尋致仕以御史薦起彰德府時山東盜賊縱橫而登萊間尤甚乃以文淵知萊州府至則浚隍崇墉以忠義激勸其民而忌文淵者方據要津或勸以饋遺免禍文淵不從復棄官歸文淵性剛直所至有聲

嚴泰汾州人宏治丙辰進士官戶部主事峻潔有治才不妄取予督鈔蘇州蔬食飲水而已鈔關故有便民小閘後并徵稅泰至罷之吳人謠曰許墅灘頭無濁水蘇州關上有青天後知登州府考治行廉平第一以介直忤時或有造飛語欲中之者泰歎曰是尙可仕邪卽抗

疏歸杜門罕交接服母喪終身不除

張禮石州人宏治丙辰進士知博興縣祀鄉賢事實無可考

辛柱石州人宏治甲子舉人知寶豐縣遷永平府同知詔封戶部郎中祀鄉賢事實無可考

劉仲原字宗本汾州人宏治中歲貢生母喪廬墓晝夜悲號有盜夜半乞火仲原與之其盜知爲孝子廬遂感化改行卒爲善類牧童樵夫皆識其墓呼曰孝子墳

劉尙忠汾州人正德丁卯舉人知合水縣縣僻事簡尙忠靜厚不擾蒞政五年晝日清閒有白鳥常集於庭擢

平涼府通判

張鍵字君重石州人正德戊辰進士官南京戶部主事忤太監劉瑾逮至京師不爲屈謫衛輝府通判瑾誅復戶部主事督儲天津流寇奄至鍵登陴誓衆晝夜不怠卒保無虞薊州莊田累經奏牘不決鍵履畝清覈歸其侵於民督餉關西招商搜逋士無饑色會蘭州大饑死者枕藉鍵發粟賑之全活甚衆及歸蘭州民遮泣立石志思擢知開封府開封中州省治隸縣四十餘文移旁午揮洒如流凡事之不便於民者必釐革之未幾卒賈繼之汾州人璡之子正德甲戌進士官戶部主事歷

至郎中寬厚廉謹有儀度未第時省父揚州有遺千金求通關節者不納便告歸父曰既來定省何遽歸邪曰恐在此多事或負大人清訓耳後以言大禮被杖明年卒

張鈞石州人父赦國子生以二親早亡矢志不仕隱居城北村鈞正德己卯舉人以親老亦不仕讀書奉養孝聞遠近嘉靖二十年俺荅兵入寇虜其父去追百餘里號哭不絕寇射中其肩拔去復馳至則父死已二日一痛而絕及甦敎父屍歸盡舐父血水漿不入口三日不勝悲痛而卒事聞建孝烈坊旌之

馮華石州人正德己卯舉人知鄆城縣祀鄉賢事實無
可考

張襄敏珩石州人正德辛巳進士授監察御史巡鹽兩
淮繼按畿輔及陝西所至貞憲釐弊獎廉糾貪時稱名
御史歷太僕大理二寺少卿僉都御史巡撫延綏尋遷
南京都察院右副都御史提督操江未幾召入協理院
事進左副都御史會宣大總督罷廷議屬珩珩以鄉曲
辭爲言者所指落職久之以原職起巡撫寧夏進兵部
左侍郎兼右僉都御史總督陝西三邊前後獲首功甚
衆上數賜璽書金幣勞之進右都御史居數歲拜戶部

尚書督理大倉未至。值延綬有警。坐失事被逮。謫戍慶陽。未幾復起爲副都御史。巡撫延綬遷前職。丁母憂歸。卒於家。年七十餘。賜祭葬。贈工部尚書。謚襄敏。珩行履修潔。器識宏遠。居官以剛介著。前後上鹽法馬政邊畧二十七疏。尤博綜羣籍。爲御史時。輔臣有謂珩才行可充講官者。欲推轂入翰林。珩三疏不就。時論高之。任道敏字濟愚。孝義縣人。正德中。知漳縣。至則撫瘡痍。招流亡。平土寇。不二年。縣大治。以疾歸。道敏性孝友。居官在鄉。皆有聲稱。

張大祿字萬鍾。孝義縣人。正德中。歲薦爲國子生。官深

澤縣丞有廉操事父母以孝聞

賈越石州人正德中知汧陽縣清正有特操遇事立決會縣境盜起越往勦遂戰死

李秉彝石州人嘉靖癸未進士知蠡縣祀鄉賢事實無可考

胡汝輔石州人嘉靖乙酉舉人知安東縣除強禁暴蒞政剛方改商河縣擢監察御史上時政十二事皆切中利弊轉按察司副使

高金石州人嘉靖丙戌進士歷兵科給事中九年上疏言陛下臨御之初盡斥法王國師佛子近又斥姚廣孝

配享臣每嘆大聖人作爲千古莫及乃有真人邵元節者誤蒙殊恩爲聖德累夫元節一道流耳有勞優以金帛足矣乃加崇秩復賜其師李德晟贈祭廣孝不可配享於太廟則二人益不可拜寵於聖廟望削元節真人號并奪得晟恩卹庶異端闢正道昌上方欲受長生術立下詔獄拷掠終以其言直釋之尋偕御史唐愈賢稽覈御用監財物劾奉御李興等侵蝕狀寘諸獄時有牛氏者恃國戚橫肆金以法治之不少貸帝聞曰此天下直臣朕所畏憚又除京師巨豪張孝後遷山東按察司副使政聲大著北直山東俱入名宦

嚴霜臨縣人嘉靖八年知褒城縣性溫和簡約以儲蓄爲急遇雨暘祈禱如響而操持廉潔終始如一

張九湖石州人嘉靖九年寧鄉縣妖人聚衆五百出入寇掠九湖願爲國除賊時官軍甚少九湖充義勇能挽六石硬弓其發矢賊卽應弦而倒乃悉來皆殊死戰官軍不支奔潰九湖猶力拒矢盡遂死之年甫十有八雷潔平遙縣人嘉靖辛卯舉人知延長縣居官九載有美政潔平易近人優禮士子尤喜崇獎節孝

張冕字服周孝義縣人嘉靖壬辰進士授戶部主事監收太倉轉本部員外郎擢河南僉事分巡大梁至洧川

因颺風辨野寺之寃人咸異之遷霸州兵備副使平土寇其居官勵操守及歸行李蕭然居家二十年博極羣書德行文學遠近推重著有勝溪文集及縣志

賈銳石州人性篤孝家貧幼孤事母竭力致養遠近皆稱曰賈孝子嘉靖十一年知州李昇額表其門禮請鄉飲力辭不赴母卒年九十八銳亦六十七矣哀毀廬墓遂卒於墓所

李翰字憲夫汾州人嘉靖甲午舉人知高陵縣存心平易遇事練達值地震人民死者過半盜賊蜂起翰立法甚嚴懲治渠魁不少狗民賴以安擢慶陽府同知

劉尚義汾州人嘉靖乙未進士由行人選御史在朝稜稜有威望降秦州判官改知朝邑縣遷松江同知俱以清介稱擢南京刑部郎中出補四川僉事兵備西蜀兼督松茂邊餉蜀人苦乞運尚義設法收給軍民兩便又釐清宿弊民作八頌以歌美之轉陝西叅議河南副使卒於官家無餘蓄尚義爲人淳朴簡淡好讀書所著有柏山集四卷詩五言尤駿駿入古

張毗石州人嘉靖乙未進士知清豐縣擢兵部主事歷至郎中出知永平府先是夢二朱衣人遺墨二笏至是謁夷齊廟所見宛如夢蒞任三年勵清操擢按察使晉

右僉都御史巡撫順天屢奏首功詔謫布政司叅議復入爲大理寺少卿遷順天府府尹轉南京戶部右侍郎召爲兵部右侍郎中途疾作至延津卒縣令發其行裝止俸銀十有七兩士論以爲仰孤竹遺風者賜祭葬如例廕一子

張德化石州人嘉靖庚子舉人孝友篤行博學洽聞不仕而卒著述甚多門人私謚貞孝先生

韓道兒臨縣人嘉靖十九年俺荅兵入境掠其母道兒追及之以石擊賊母脫歸而道兒被殺年甫十有七事聞得旌從祀鄉賢

張丞相石州人少孤及長爲諸生事母以孝聞嘉靖二十年俺荅犯石州母被執奔救俱被殺寇退人往視之其屍尚抱母之頭有司申請立孝烈碑是時殺掠甚慘石州爲親死者十有一人

于溥石州人二歲而孤奉母盡孝年十八讀書城中嘉靖二十年俺荅兵抵城下號歸求母母已被執道遇之取石擊寇寇就剖其心而死母得遁去事聞旌表

張永安石州掾吏嘉靖二十年父爲俺荅兵所逐持挺追之擊傷二賊父得逸去而身自後衛之被數十創死事聞旌表

楊經寧鄉縣廩生嘉靖十九年俺答兵入寇其父被殺
經率二子淑湘提鐵棍重四十斤結河南力士于邦直
時人號之曰王千斤者俟間深踐寇地殺獲首虜還謁
軍門凡歷三年餘軍門送歸本縣肄業知縣旌以額曰
忠孝天成

霍冀字堯封孝義縣人嘉靖甲辰進士授永平府推官
擢監察御史清軍浙江巡按河南平土賊師尙擢大理
寺寺丞都察院僉都御史巡撫寧夏戎事甚飭賜金綺
移鎮保定畿右歲禮嚴武備發倉廩民賴全活蘇昌宣
大以缺餉告命徧歷疆場盡得耗蠹侵冒之實因條上

恤軍通商轉輸積貯四事制可尋命總理山東河務轉
兵部侍郎總督三邊軍務厚恤死事汰儲將不職者募
丁壯激忠義修戰守具軍容一新時延寧兩鎮皆有奇
捷晉兵部尙書料天下戎馬強弱邊塞要害及諸將帥
材勇高下悉經畧劑量之宜以議憲臣功罪及京營事
宜兩忤輔臣乞歸冀歷官三十年持已接物溫恭端重
而才力過人事至轉化無滯年六十卒賜卹典如例
陳謨寧鄉縣人嘉靖丙午舉人初任知縣歷官戶部郎
中性謹厚廉潔動履不苟執父母喪廬墓六年兄訓歲
貢生家庭以孝友稱並爲士論所重

梁明翰字維憲孝義縣人嘉靖丁未進士授刑部主事歷至郎中知慶陽府遷按察司副使邊陲騷動撫降其衆轉太僕寺卿陝西叅政遷四川按察使明翰性長厚賑恤鄉黨與人交恂恂禮法居官平易近人年八十三卒

張芹字獻之孝義縣人嘉靖丁未進士觀政解餉雲中愆期左授山東布政司照磨權知肥城縣遷安期縣招集流移民多復業改濟源縣擢戶部主事轉郎中知延安府有惠政民爲建生祠

劉有誠字存甫寧鄉縣人明嘉靖丙辰進士官行人司

行人轉司副正四十二年遷刑部江西司郎中。讞獄多所平反。隆慶二年起服。除刑部陝西司郎中。案徒李朝等爲亂。勢猖獗。有誠廉得其狀。畫策擒渠魁數人。平之。明年授浙江按察司副使。會歲饑。請於巡撫賑恤。二十餘州縣賴以全活。勅臨清兵備。尋督學陝西。擢山東布政司叅政。分守海右。藩王奪取民田。以爲莊田。歷年已久。有誠理而歸之民。礦賊嘯聚爲變。有誠鎮靜以消之。時青境凶荒流離。殫心招撫。設法輕減徭賦。手校簿書。主寢食俱廢。得病告歸。半載撫按促之起。入境民如見慈父母。值漕渠淤塞。開新河。有誠與贊籌務求所以寬

民力前病復作卒於官病劇時諄諄如夢中語猶以東人困役爲念有誠性嚴毅自其少好濂洛諸儒之書有所感動則錄出粘壁間爲學首嚴義利置紀過簿慎獨牌以自警嘗慕明道文清志行諸葛文山忠貞居官勤於民事所至除積弊之病民者及卒囊無長物僚屬捐俸助衣衾巡撫以下咸感其廉操厚恤其嗣萊人建祠勒碑著有詩文語錄數十卷子士宏爲諸生天性孝篤早失母晝夜爲孺子泣事祖母晨昏定省躬自炊爨父疾篤衣不解帶及歿毀幾殆撫諸弟友愛里黨共稱其行

王緝汾州人嘉靖己未進士授吉安府推官以母老迎養不便疏請就近改助教歷職方司郎中擢太僕寺少卿轉僉都御史巡撫貴州苗民歸附賜金幣進副都御史巡撫南贛終戶部右侍郎歷官三十餘年兩爲巡撫尤多建樹貴州建祠祀焉所著書有防邊紀畧

趙訥字孟敏孝義縣人嘉靖己未進士知定興縣賑饑有法改江都縣時權貴欲以其縣稅糧洒派鄰縣訥不從擢刑部主事服闋補戶部差管徐州倉出羨餘修呂梁洪橋轉郎中知保寧府甫三月乞歸囊橐蕭然訥性儉約不治家人生產嗜讀書寒暑不輟教人以孝友爲

先實行副之刻語錄詩文三十卷雜著選次七十八種
郡縣續志其一也年七十九卒門人私謚文直先生
王友賢寧鄉縣人嘉靖己未進士歷知長安曲周二縣
擢湖廣道監察御史遷大理寺丞轉少卿歷光祿太常
大理寺卿工部侍郎南京戶部尙書加一品俸卒贈太
子少保友賢雅度抑抑而深沉有執持在朝不阿權要
其行事無遺文可考

薛東海石州人嘉靖壬戌進士知滑縣守官剛方嗜學
至老不倦生平多所著述

張更化汾州人嘉靖乙丑進士授南陽府推官隆慶三

年擢監察御史明年巡視兩浙萬歷元年巡鹽政按鳳陽三年南畿道刷卷胥以整飭著五年擢陝西副使遷叅政丁憂服闋補湖廣叅政十四年遷山東按察使丁母憂復補原任十九年遷右布政使歷河南左布政使二十一年晉階太僕寺卿致仕更化歷官所在有聲性端嚴鄉人胥敬之有祠祀在城東關子熾以孝行稱朱表樞慶成府奉國將軍嘉靖中俺荅入寇表樞赴闕獻策忤嚴嵩意以越職言事斥之歸後寇圍汾陽慶成王知其能與畫策登城守出奇計擊賊賴以保全表樞精韜畧所著有陣圖撞石飛礮滾標戰車懸樓等式或

言表樞嘗得異術臨陣祭大蜂蔽天入敵營蜚死甚衆
故解汾州之圍

田賦孝義縣人嘉靖中肄業太學賦七歲喪父慟毀骨
立母病跣步不離顙天請代以憂瘁髮盡白與弟佃至
友愛因思母不置遂成病卒鄉人稱之爲田夫子

趙師商孝義縣人嘉靖中貢生官清苑縣主簿執法不
撓條論時政多見採納尋歸其居官在鄉事有濟於人
知無弗爲祀清苑縣名宦

高崧寧鄉縣人隆慶丁卯舉人初任知縣歷官真定府
通判居官清正惟恐不義涉躬

文揚孝義縣廩生隆慶元年俺荅兵入其里肆殺掠揚避走出舍尋其父知被執往救乞代不得遂並見殺

孫士亭臨縣人俺荅入寇扶父避入崖谷一賊追及之士亭以所持鏹與鬪擊賊走入營中羣賊持弓矢射士亭中二十七箭死父得免有司上其事立坊旌表

張格石州諸生負母避難遇賊將刃其母哀泣求代不得罵賊而死

張中路孫光裕車成並石州諸生俺荅入寇與州民張邦化李正秋崔桂劉朝瑚守城死祀州北忠烈祠

陳王道寧鄉縣人萬歷壬午舉人知延川縣改清澗理

冤獄判決如流咸得其情而廉潔自持循聲大著擢真定府同知

王政字正之孝義縣人萬歷癸未進士初知宜陽縣獄稱平改清苑縣裁冗費撫流亡不阿權貴擢刑部主事督漕運清剔漕弊性鯁直其行事不少假借

范道行字太衢平遙縣人九歲能文善詩歌萬歷癸卯舉人知澠池縣立學校重農桑民感其德爲立生祠以宦官魏忠賢索賄不應被劾歸李自成之亂罵賊死

梁殿邦字元鎮平遙縣人萬歷丙午舉人知三水縣少孤嫡母閻氏母曹氏殿邦有至性事母曲盡孝誠負異

才爲文與古文行並爲世所重

喬承詔字揚名介休縣人萬歷庚戌進士知南宮縣擢按察御史按閩平海寇地方寧謐以薦舉與當事不合歸杜門著書崇正中召起爲太僕寺少卿催餉陝西憫其民貧憊疏奏寬減憂勞得疾卒於行署從祀鄉賢給子孫奉祀生員

董承業字紹休介休縣人萬歷癸丑進士官中書歷刑科兵科給事中因陳時事忤宦官魏忠賢被劾免官杜門著書及魏璫敗召起太常寺少卿感痿痺疾告歸卒於家舊介休民多以輸粟於邊蕩產承業適奉差至大

同言於巡撫得改折色民永使之

王四維永寧州人萬歷戊午舉人知邵陽縣甫下車值歲饑斗米錢千二百立請蠲賑設施有法全活甚衆擢衛輝府同知監軍餉畫謀擒叛總兵劉超以功擢異

王文清永寧州人萬歷己未進士累官都察院右副都御史巡撫遵化等處清介端方朝野倚重致仕歸父維機贈奉政大夫刑部郎中祀鄉賢事實無可考

任尙智孝義縣人萬歷中貢生知三河縣以不媚權要致政歸鄉黨咸重其清操

王裕心字元涵孝義縣人政之子天啟壬戌進士官南

京國子監博士疏訟楊漣寃陳魏忠賢罪惡狀留中不報轉戶部郎歷大名寧夏蘭州榆林道皆有政績擢右僉都御史巡撫西安數立軍功致仕歸值李自成之亂不食死

馬初登字揚衡介休縣人天啟甲子舉人博閱羣書尤精心於易時流寇猖獗初登設法守禦城賴以全

李開先汾陽人天啟丁卯舉人有善行鄉人多德之祀鄉賢

李英俊介休縣人父天質狂疾投井英俊時方灌園奔救不及隨投井中俱死天啟中有司旌其門

趙宗堯平遙縣諸生父歿三年人未嘗見其喜笑與弟宗武事母盡孝道崇正中知縣于爾直桑開皆旌以額生平周恤親族多善行

胡遇春字統三汾陽人少孤家貧崇正戊辰進士知聊城縣詢縣中利病知其最苦者歲報大戶充徵解水陸道艱軒絡繹破編民產十八九遇春乃建議設吏代之以贖錢侍器用諸有賠累則出於官而供張亦咸辦壬申河大浸遇春左右指畫疏洩之必退而後已水既退穀播種復請免額稅未幾權知臨清州值孔有德兵屯州境遇春率州兵以守時出不備襲擊敵始逸大學士

朱延禧，聊城人也。有僕奴犯陰罪，匿相府，遇春必捕之。正以法指揮德州滿某，狎一倡婦，窺倡多金，盜攫去。倡恚死，倡弟訟之。滿賂當道屬誣倡弟坐死。遇春爲直之，曰：「不以賤抑其冤，其忒。」子書曰：「汝父半生半死人，斷不作貪墨吏爲若輩牛馬。切勿學豪華兒，姘鄉間敗吾志。」蒞政六年，擢戶部主事，以病歸。抱病五六年卒於家。子庭字季子，李自成之亂，庭遂與弟同，並隱居講學。庭於易、詩、春秋論語、大學、中庸、孟子皆有論著，同精明醫學。四川總督某請治篤疾，至則愈。且敬其爲人，遂深交。屬員有以三千金致饋，求同一言者，峻拒之。兄弟共勵名。

節有學守

劉三元字聚奎平遙縣人崇正庚午舉人性方嚴負節概初知樂城縣教民稼穡俾無曠土無惰民擢兵部車駕司主事兼戶部事出爲寧遠道會李自成之亂三元與諸生范羽可等糾集各路義師至數十萬及事無可爲遂棄家爲黃冠放浪山水間後遊樂城舊治士民張樂伐鼓方於生祠爲賽會三元徑入祠踞坐取爵暢飲衆環視識之曰吾父母也羅拜痛哭後卒於樂城李元炫石樓縣諸生謹厚有學崇正五年李自成之亂賊執之罵不絕口以死有司旌之曰義士

曹良直字古遺汾陽縣人崇正丁丑進士知尉氏縣歷
知靈壽雄縣擢兵科給事中條奏兵形八事一軍令不
可輕更兵機進止呼吸變化此行間事也若樞臣調度
惟宜斷之以大義如近者督師薊督領兵前進威必宜
揚侯國必宜救此大義也忽而以尾追無益議撤忽而
以東西分入催戰在廟堂之上不過一轉語耳而三軍
之衆倏進倏退幾等兒戲且進退之間勞逸生死判焉
必有心志搖搖怨聲載道者言之可畏以後請痛戒之
一聞外不許請旨將在外君命有所不受況陛下神謨
廣達屢有原不中制不許遙請之明旨近來將帥故違

頻瀆習以爲常此不過馴陛下下一旨以爲釀罪地耳且請旨疏入而營謀安頓之伎倆種種隨之矣此奸弊之尤也卽或無他而兵機呼吸立變彼馳奏候旨部覆又候旨往返等待之間事機已去矣陛下徒勞批答樞臣徒費申飭無益也以後凡有遙請者比逗遛科罪一入援不許請旨臣子赴君父之難義惟一往更無轉念近來庸懦撫鎮旣聞邊警疏請入援明係逗遛觀望其中布置安排且不可測也此豈復有人臣禮乎除如遼楚秦豫身臨大敵原應請旨外其餘皆屬不臣後有犯者立逮正法一援兵不許報號樞臣一聞邊警調取各路

援兵文內必有赴某軍前聽調度之辭此卽信地此卽軍令也近見各援兵至必先赴京兵部報號雖覲面遇敵亦不戰曰我未報號也軍法離信者誅違令者誅獨不一問乎夫援兵遠至聖恩必有賞犒臣謂如調兵文內係來京者就京城外賞犒之若調兵文內派有某軍前者宜將賞犒發至軍前違限後至者竟免卽報號必不可廢亦止許數人入都違者以枉道逗遛論罪一監軍不許敘功將帥皆在功罪之中惟恐欺飾而後設監軍焉若一體敘功扶同之弊必滋故監軍止許事後敘勞卽論功罪亦宜以精核爲功通同爲罪若戰勝獲功

不許列名違者以冒功置罪如是則監軍脫然於功罪之外必無通同欺飾之弊矣巡按亦然宜著爲令一監軍不許鈔將帥之塘報將帥在功罪之中塘報大半欺飾監軍者宜自領一旅專視各將功罪臚列塘報刻期密奏其於將帥塘報許從公駁正并奏如有通同掩飾別有奏聞監軍重罰不赦一戰守之功不宜并敘行間欺飾之弊最多如將帥欲飾罪必先報功而又恐人發覺乃并地方官亦敘在內甚有敘及巡按并鄉紳過客者或云措餉設犒或云添兵助器或云指授方畧此無他蓋欲人人在功之中而無異辭以遂已之欺飾也以

後列名者以冒功論罪庶將帥之欺飾少止一舉將連坐之法宜有分別聖明之世豈乏禦侮之材而人每每知而不舉者惟連坐是懼然而連坐可不行歟亦曰稍爲分別可耳如督撫鎮將除一籌莫展以及大貪大詐連坐不宥外其餘清勤勇烈而爲時勢窮困者姑免連坐若所舉之人生平可諒忽變而爲貪詐其舉主能自參者亦與免罪良直少甚貧族人中有欲助之貲爲治生計者謝曰吾輩豈逐末營利邪及歷三縣所至有政聲去之日民泣送者盈道性嫉惡在朝彈劾不避權貴以直聲著卒於官

田芳孝義縣人崇正丁丑進士歷官陝西河南提督江西學政擢太常寺正卿以廉正著所至有政績

朱新堞明宗家汾陽縣崇正十四年由宗貢生知中部縣時縣殘民困繪流民圖將上之會公事出土寇陷城免官已而復任命下賊破潼關已五日矣毅然曰此吾致命之秋也受事未旬日賊傳檄至新堞方巡城怒而碎之立斬來使欲效死守而縣新破人皆逃散乃書表封印使人馳送京師具冠帶望闕拜又望拜其母卽自經士民葬之社壇側妻盧氏妾薛氏馮氏見新堞誓死以待賊至請先縊以盡節新堞撫而勉之左右皆泣士

民亦以耐葬

傳作楫孝義縣人崇正癸未進士知慶都縣歸後事父母二十餘年有孝行國朝順治六年姜瓖之亂迫脅不從逃入山中及賊平大將軍手諭招之作楫至營以老疾固辭入城見尸橫道中悉爲掩埋收養逃亡男婦凡百餘人遣之歸家所著書有銘心集二十卷

朱敏濛字龍澤慶成府鎮國將軍軀幹甚偉好直言傲岸之氣人多憚之聞賊據平水敏濛出家貲盡散與貧窶及賊至被執詣李自成使跪敏濛厲聲曰我將軍也大宗之膝豈爲賊奴屈哉自成令捽下敏濛振聲一喝

擇者披靡退數武羣賊蜂擁爭批其頰罵不絕口折頸裂股而死

馮運泰字來吉汾陽縣諸生豪宕自喜善屬文賊入境運泰拉同儕日夜晝守城策甚悉以上當事賊諜廣布知運泰首規拒賊方薄城即使使縛以見運泰聞之仰天嘆曰死則死耳安有昂藏丈夫而受賊刑辱哉遂投井死里人收殮如禮題其棺曰明殉節處士馮生之柩楊正春字榮初汾陽縣諸生李自成之亂賊執之去使飼馬他所正春薄暮具衣冠入文廟瞻拜痛哭隨投井是夜見夢於室人曰我得死所矣但水寒沁骨盍早出

我室人夜起而號徧覓不得次夜復夢曰我在府學井中何他求也往視之果得正春屍正春死時有丐者見之與人言其狀

賈守亨字通吾汾陽縣人少任俠不羈賊氛四起守亨偕里中好事者習射東郊賊至境人多謀出迎守亨不許及賊入其室大罵格鬪隨手而倒衆賊持挺亂下守亨給曰汝不過欲得財耳我有伏藏爲汝探取汝不得唐突以辱我賊諾守亨入拔刃大叫自剖其腹血濺壁腸委於地賊隨後窺伺大驚走

王尚龍字雲從平遙縣貢生崇正中歷官兗州府通判

擢知陝州事。父母曲盡孝道。父文俊壽百歲。母白氏亦九十有二。

文雲鳳。介休縣人。崇正中。以材武選置近侍。李自成犯京師。懷宗崩。雲鳳趨與母訣曰。願以死報國。母曰。吾從子食祿天朝。寧再見他姓。願先死以成子志。遂自刎。雲鳳縱火焚宅舍。及妻子女同時俱死。

喬遷。介休縣諸生。太僕承詔之子也。甲申之變。賊執之。遷抗直不屈。視有井。遂投之。賊曳出。以火灼其腹。罵賊不絕聲而死。

鄭登雲。石樓縣人。見父病垂危。惶急不知所爲。遂割股。

作羹以進疾漸愈生平好施與恤窮乏值亂賊執之不屈而死

高宗文永寧州貢生官汾西縣教諭致仕歸闖賊之亂賊將田虎攻州城宗文知城陷索朝服北面望闕拜秉燭端坐賊入其家死之

張素永寧州諸生李自成之亂城陷被執不屈得脫投井死

梁國棟永寧州人性孝友流賊陷城衛父被砍四刃見父遇害罵賊求死賊曰孝子也釋之時季父及弟亦爲賊殺國棟備棺掩葬負母出城隱居奉養

賀來佐汾陽縣人八歲喪父盡哀明年母病來佐廢寢食奉侍藥餌四閱月如一日及卒不食五日哀毀骨立終制後補博士弟子員

李憲平遙縣人官保定府太寧衛經歷擢耀州同知轉山東布政司理問食知州俸歷官二十年清慎如一日事母孝甘旨奉養一飯不離及歿執喪三年事死如生士大夫咸高其行祀耀州名宦

梁棟隆平遙縣貢生官華陰縣縣丞清慎有聲事繼母以孝聞

邵希曾平遙縣諸生幼孤家貧事母張氏自甘粗糲曲

盡色養撫按聞其孝屢發粟旌賞及母歿後歲薦入官
恨未祿養猶時哀傷慟泣

趙澄平遙縣監生母喪廬墓朝夕泣奠塋中草木冬萌
有司旌表其門

王欲見字以道平遙縣諸生以孝行稱於鄉鄉人喜言
其事親居喪可以爲法

張榮平遙縣人父患疾不能轉側榮朝夕不離奉侍二
十餘年未嘗處私室父亦尋愈有司聞而旌之

石修玉平遙縣人官守備時山賊劫掠村堡修玉捕禦
之斬獲甚衆羣賊圍數市又格殺數人死之當事旌以

忠勇

尙義字用方孝義縣人有至性父卒事祖母繼母曲盡孝誠祖母患青盲日夜哀禱尋果復明

李天育孝義縣諸生父以酒後狂罵鄰里其母抑之房中遂憤而自殺天育痛父死非命遂絕飲食蹣跚哀號三日卒督學周繼昌表其閭曰孝子

白騰蛟臨縣人官薊鎮總兵官都督簽事力戰死

宋銳臨縣人知洋縣時藍鄙警擾羽檄傍午外給軍餉內撫民心境賴以安

賀進臨縣諸生父以罪當死進詣官求代詞極哀切官

憐其志繫獄中聽決者三次後奏請得有

賀希孔石樓縣諸生母張氏早喪家極貧事父仲賓嘗從承和負米色養備至及終廬墓三年有司聞其孝行額旌之

甯孟魁石樓縣人事親承顏順志跬步不離父病衣不解帶者五十餘日及歿終喪三年獨居食粥縣人稱其孝行純篤

孫子文永寧州人以貢生知南和縣廉能有善政民建祠祀之

賈越永寧州人以貢生爲知縣祀鄉賢事實無可考

平遙縣人王茂蘭楊國洪孝義縣貢生張均臨縣諸生
溫勵高節武衛寧鄉縣人史勉皆以孝稱其廬墓稱孝
者孝義縣則有張大登永寧州則有貢生王雨梅寧鄉
縣則有王伯誦貢生李士光武舉張需諸生楊聯芳封
股稱孝平遙縣則有梁州尹梁州儒介休縣則有王延
孝義縣則有楊梁任國充李異香寧鄉縣則有李永

右明百六十餘人舊志列辛彥博董齡李秀賈璇田
耕劉仲原嚴泰賈繼之劉尙義張更化劉基李鳳臯
張傑任義李穎李頤任良才任良弼溫恭霍韜李憲
梁卜董謙武允曹輿董瑾文瑞溫廉馬驥張翼石瓚

文揚武賢周儀霍冀趙訥車霆張珩張玘楊昇王約
龐輔劉清劉有誠陳謨王友賢高崧四十七人劉基
自其上世當宋時已居青田溫恭霍韜劉清王友賢
別見仕實董謙別見義行